

Morning Dogri (NSD) National News Bulletin 10-05-2024

आकाशवाणी

खबरां जतिन्द्र सिंह कोला।

1. बक्ख-बक्ख राजनैतिक पार्टिएं दे नेता लोकसभा चुनाएं च बाकी बचे दे गेड़ें लेईं मुख्य भरै च रैलियां करा'रदे न।
2. भारत-बरतानिया बश्कार सलाना सामरिक गल्लबात कल नमीं दिल्ली च होई।
3. उत्तराखंड च अज्ज अक्षय तृतीय दे मौके पर केदारनाथ धाम दे कपाट पूरे विधिवत ढंगे कन्नै खोले गे।
4. डीआरडीओ नै घोषणा कीती ऐ जे ओह्दी इक लैब नै अत्याधुनिक एयर ब्रिदिंग इंजन लेईं तरल रैमजेट ईंधन विकसित करने च कामयाबी हासल करी लैती ऐ।
5. हॉकी इंडिया नै एफआईएच हॉकी प्रो-लीग 2023-24 च हिस्सा लैने लेईं भारतीय मर्दे दी हॉकी टीम दे 24 मिंबरें दी घोषणा कीती।



Rallies

लोकसभा चुनाएं दे बाकी रौहदे गेड़ें लेईं बक्ख-बक्ख सियासी पार्टिएं दे नेता रैलियां करा करदे न। बीजेपी दे वरिष्ठ नेता अमित शाह होरें कल तेलंगाना च भोंगीर लोकसभा चुनां हल्के च प्रचार कीता। कांग्रेस दे वरिष्ठ नेता राहुल गांधी होरें कल संजा आंध्रप्रदेश च नरापुर ते तेलंगाना च सरूरनगर च चुनां रैलिएं गी संबोधत कीता। बीजेपी अध्यक्ष जे.पी. नड्डा होरें कल उत्तर प्रदेश च चुनां प्रचार कीता। फतहपुर च इक किट्ठ गी संबोधत करदे होई उनें आखेआ जे पिछले 10एं ब'रें दरान एनडीए सरकार विकास लेईं कम्म कीता ऐ। उनें चित्रकूट च बी चुनां रैली गी संबोधत कीता। लखनऊ चुनां हल्के थमां बीजेपी दे मेदवार राजनाथ सिंह होरें बुद्धिजीविएं दे किट्ठे गी संबोधत कीता। बीजेपी दे वरिष्ठ नेता ते उत्तर प्रदेश दे मुखमंत्रि योगी आदित्यनाथ होरें लखीमपुर खीरी ते सीतापुर रैलिएं गी संबोधत कीता। समाजवादी पार्टी दे प्रमुख अखिलेश यादव होरें कल बैरेच च चुनां रैली गी संबोधत करदे होई आखेआ जे बीजेपी करसानें ते युवाएं दे खलाफ कम्म करा'रदी ऐ। उनें धारदरा

ते लखीमपुर खिरी चुनां हल्के च बी चुनां प्रचार कीता। कांग्रेस दी महासचिव प्रियंका गांधी वाड्ढा होरें कल रायबरेली च चुनावी जनसभाएं गी संबोधत कीता ते आखेआ जे जित्थें—जित्थें बी कांग्रेस दी सरकार बनी ऐ उत्थें—उत्थें घोषणा पत्र च कीते गेदे वायदें गी पूरा कीता गेआ ऐ ते अग्गे बी कीते जांगन। बहुजन समाज पार्टी दी प्रमुख मायावती होरें कनोज जिले च चुनां रैली गी संबोधत कीता ते बीजेपी उप्पर नशाना साधदे होई आखेआ जे बीजेपी उयै कम्म करा'रदी ऐ जेह्दे थमां कांग्रेस गी सत्ता थमां बाहर होना पेआ।

<><><><><><><><>

Withdrawal

लोकसभा चुनां दे 6में गेड़ लेई नामांकन वापस लैने दी प्रक्रिया कल समाप्त होई गई। इस गेड़ तैह्त 6 राज्यें ते 2 केन्द्र शासत प्रदेशें च फैली दिएं 58 संसदीय सीटें पर इस म्हीने दी 25 तरीकै गी वोट पोआए जांगन।

<><><><><><><><>

Gujrat Election

गुजरात चुनां आयोग नै मतदान प्रक्रिया च गड़बड़ी गी दिक्खदे होई दाहुद इलाके दी संतरम पुर मतदान केन्द्र च परतियै वोट पोआने दी घोषणा कीती ऐ। एह मतदान कल करोआया जाग, जित्थें बडलै 7 बजे शा लेइयै संजा 6 बजे तोड़ी वोट पोआए जांगन। कल गांधीनगर च मीडिया आले कन्नै गल्लबात करदे होई संयुक्त सीईओ ए.बी.पटेल होरें दस्सेआ जे एह फैसला रिटर्निंग अफसर आस्सेआ इक वीडियो दे वायरल होने मगरा दर्ज करोआया हा। शकैत दे पेश कीती रिपोर्ट दे आधार पर लैता गेआ ऐ। उनें अग्गे दस्सेआ जे मतदान अपने समें 6 जनें गी मुअत्तल करी दित्ता गेआ ऐ।

<><><><><><><><>

India-UK

भारत—बरतानिया बशकार सलाना सामरिक गल्लबात कल नमीं दिल्ली च होई। भारत दे राश्ट्री सुरक्षा सलाहकार अजीत डोभाल होर बरतानिया दे राश्ट्रीय सुरक्षा सलाहकार टिम बैरो हुंदे कन्नै इक मीटिंग दी सह—अध्यक्षता कीतीफ। मीटिंग दरान व्यापक सांझ—भ्याली ते कुलसंसारी सुरक्षा चुनौतिएं बारे चर्चा कीती गई। विदेश मंत्रालय दे प्रवक्तारंधीर जयसवाल होरें

आपखेआ जे मीटिंग दा मुख्ख ध्यान प्रौद्योगिकी ते सुरक्षा सरबंधी पैहलकदमिएं पर हा, जेहड़ी दपक्खी सरबंधै ते सांझ-भ्याली गी होर तगड़ा करने च महत्वै आली भूमका नभा'रदा ऐ। उनें आखेआ जे दौनें मुख्खें आपसी हितें आले इलाकाई ते कुलसंसारी मुद्दें पर बी चर्चा कीती। बरतानिया दे राश्ट्री सुरक्षा सलाहकार होरें विदेश मंत्री डॉ. एस.जयशंकर हुंदे कन्नै बी मलाटी कती।



Kedarnath

उत्तराखंड च अक्षय तृतीय दे मौके उप्पर केदारनाथ धाम दे कपाट अज्ज पूरी रीति-रिवाज कन्नै विधिवत तौरा पर खोली दित्ते गे न। इस मौके पर उत्तराखंड दे मुख्खमंत्री पुष्कर सिंह धामी होर बी मजूद हे। अज्ज बडलै वैदिक मंत्रोधारण कन्नै केदारनाथ धाम दे कपाट खोली दित्ते गे। इस मौके पर बड़ी मती गिनतरी च श्रद्धालु उत्थें मजूद हे।



DRDO

डीआरडीओ नै घोषणा कीती ऐ जे ओह्दी इक लैब नै अत्याधुनिक एयर ब्रिदिंग इंजन लेई तरल रैमजेट ईंधन विकसित करने च कामयाबी हासल करी लैती ऐ। इस ईंधनद 1 कल डीआरडीओ दी इक लैब च कामयाबी कन्नै रैमजेट परीक्षण कीता गेआ। इस ईंधन दे विकास च बीपीसीएल ते एमओसी उद्योगी भ्याल न।



Padma Awards

राश्ट्रपति द्रौपदी मुर्मू होरें कल राश्ट्रपति भवन च इक समारोह दरान पद्म पुरस्कार भेंट कीते। राश्ट्रपति होरें कलाकार डॉ. वजंतीमाला बाली ते तेलुगु फिल्म अभिनेता के.चिरणजिवी होरें गी पद्म विभूषण पुरस्कार भेंट कीते। सुप्रीम कोर्ट दी पैहली महिला एम. फातिमा बीवी होरें गी मरणोप्रांत पद्म भूषण कन्नै सम्मानत कीता गेआ। मन्ने-परमन्ने दे दिल दे डाक्टर डॉ. अश्विनी बालचंद मेहता ते वरिष्ठ सियासी नेता राजागोपाल होरें गी त्रिये बड्डे सिविल पुरस्कार कन्नै सम्मानत कीता गेआ। अध्यात्म दे क्षेत्र च बेमिसाल योगदान लेई टोगदान

रिनपोचे होरें गी बी मरणोप्रांत पद्म भूषण पुरस्कार भेंट कीता गेआ। खेड्डें दे खेत्तर च जोशना चिन्नप्पा कृषि दे खेत्तर च के.चेलामल हिंदोस्तानी शास्त्रीय संगीत दे खेत्तर च सोम दत्त बाटू ते मूर्तिकार ए.वेलू आनंदचारी होरें गी पद्म पुरस्कार कन्नै सम्मानत कीता गेआ।

<><><><><><>

VP

उपराश्ट्रपति जगदीप धनखड़ होर अज्ज संजा अयोध्या मंदर जांगन ते रामलला दी पूजा-अर्चना करगंन। अयोध्या च श्रीराम जन्मभूमि उपपर रामलला हुंदे विराजमान होने मगरा उपराश्ट्रपति हुंदा एह पैहला दौरा ऐ। उपराश्ट्रपति ते उंदी घरै आली डॉ. सुदेश धनखड़ होर तकरीबन 3 बजे अयोध्या पुज्जगंन। ओह श्रीराम लला मंदर, हनुमानगढी मंदर ते कुबेर टीला दे दर्शन करगंन।

<><><><><><>

Hockey

हॉकी इंडिया नै बैल्जियम ते लंदन च होने आली एफआईएच प्रो-लीग 2023-24 लेई भारतीय मर्दे दी हॉकी टीम दे 14 मिंबरें दी घोषणा करी दित्ती ऐ। बैल्जियम च प्रतियोगिता दा पैहला गेड़ 22 मई गी शुरू होग ते 30 मई गी समाप्त होग। इआं गै लंदन च प्रतियोगिता दा गेड़ पैहली जून थमां 12 जून बश्कार खेड्डेआ जाग। इस प्रतियोगिता च भारत दे मैच अर्जेनटीना, बैल्जियम, जर्मनी ते बरतानिया खलाफ होंगन।

<><><><><><>

IPL

आईपीएल क्रिकेट च जंदी रातीं रॉयल चैलेंजर्स बैंगलोर ने पंजाब किंग्स गी 60एं रंजें कन्नै हराई दित्ता। जंदी रातीं हिमाचल प्रदेश दी धर्मशाला थाहर खेड्डे गेदे मैच रॉयल चैलेंजर्स बैंगलोर आस्सेआ दित्ते गे 242 रंजें दे लक्ष्य दा पिच्छा करदे होई पंजाब दी टीम 17 ओवरें च 181 रंज पर ऑल आउट होई गई।

<><><><><><>